

Jo ich ghöre jetz scho all em Saal doenne Säge
wiso duet der Komedi nömm sini tüüri Schaale träge
das esch das es do wäge mer kei falschi Froge cha geh
wie: händs dee z`Hamborg em Poff verhaftet oder besch Ex Chef vo de ABB

Nach em Grundig vor Swissair muess de Bond dene Gäld go pompe
drofabe bättlet schoweder d`Expo 02 well`si sosch tüege verlompe
was mech jetz do no wörd wonderneh die Frog esch noni vom Tesch
jo wer get eigentlech den Gäld wenn de Bond am Bode esch

Aus für Tv3 ond Tele 24 wo send jetz all die Kracher
we "Sonntalk" "Wer wird Millionär" oder "Wannemacher"
das die Private er Schwyz kei Chonce händ fendet de Weldbärger en Bsches
ond de Schawinski rüeft us das gets ä nor Idee Suisse

Es weises ich es weises du es weises au din Bappe
sed eh ond jeh choschtet ber Poscht e 90er Marke 90 Rappe
oh wäre die doch nor vo Zyt zo Zyt met eme Priese ue
den mieches jetz ned we z`Umike jedi 2. Poschtstell zue

Min Fc Bee esch of Platz 1 dank eme super Präsidänt
ond well si sed es paar Johre scho de gliche Trainer händ
derzu no s`neue Stadion vo de Zueschauer heiss begehrt
jo komisch seit do en GC Fan be eus eschs ergendwie omgekehrt

Ich stoh am Baregg vor de Curlinghalle ond ha gmeint ich tüeg scheele
do stoht doch vor mer de Boris Becker wo wot go Curling speele
ich ghör grad wes Frölein ar Kasse seit Herr Becker aständig sammer
be eus börschte mer den of em lis ond ned e de Bäsechammer

Woni chörzlech met mim Kolleg dors Städli Brogg be gloffe
jo do hämmer doch öberall do die komische Süüle atrofte
drofabe sägi den voller Stolz zo mim Brogger Bekannte
also du do hämmer den z`Rinike scho die schönere Hydrante

10 Jahr nach dem er zue gmacht het esches ändli sowit cho
ond mer het euse öber 100 Jährig Hersche en Ordsbeldschotz ufgnoh
ond den so e ca 150 Jahr ich danke scho chli vorus
do passiert dank s`gliche a de Bronnmattstross met em rote Hus

Ich ha zom Gummi Schumi gseit du chönntsch de Hersche doch chaufe
er Schüür os machsch din Chlitierzoo wo d`Viecher frey chönd omelaufe
ond din Privatflogplatz du de bousch ofem freye Altersheimland obe
ich hätten fasch scho überschnöret gha do het Gmei gäg de Floglärm isproch erhobe

Nachdem de Lende ond de Chestenebaum send omgsaget gsi ame Morge
do hani euse Gmeirot gfrogte we tüender das huffe Holz entsorge
he das verteile mer dank de neu Gehwäg entlang bes ufe zom Lauper Bänz
ond mached so er wärded stuune de Brogger Altstadt konkuränz

Euse Ex Gmeindamme Ueli Achermäa ich tue ned übertriebe
de werd mer secher no ganz lang en gueter Erennerig bliebe
be sim Absched a der letschte Gmei send mer Träne cho deswäge
was i Gottseidank bem Absched vom Lehrer Baumbärger ned cha säge

Zom Schloss no e vorsorgliche Mäldig höt werd ich ein saufe
ond den ergend einisch z`Nacht stockbsoffe hei laufe
well nähmli nach de neuschte Gröcht es halbs Jahr nach de Wahle
do welle mer schiends no all Umiker Gmeirotskandidate eis zahle

Der Komedi⁰²

Wänd er me bsueche? Ich be dehei onder „www.komedi.ch“

Be de Riniker Fűrwehr wössed er das au
jo do gäbis schiends so Lüt die nähmes meh als genau
die gönd met ehrem Fűrwehrgwand met Häntsche Helm ond Mötze
sogar denn wennis gar ned brennt Oswärts goge sprötze

Euses Fasnachtsmotto "Mer hebed ab" jo das werft grossi Welle
nei wörkli sogar z`Amerika duend sie devo verzelle
jo was d`Riniker chönnd chann ich scho lang seit det ein met lutem Gschrei
ond den chonnt de Teenager met 2 Goldmedaille hei